

LAMENTACIONES

I Yuq'uel Jeremías

I ch'ijiyemlel jini xcΛjchelob

1 Jiñach i t'an Jeremías: Ñach'Λlix i bijlel tac Jerusalén ba' motocña winicob x'ixicob ti yambΛ ora. Ch'ijiyem jini tejclum che' bajche' meba' x'ixic che' i bajñel mi' cΛytΛl. Ti yambΛ ora tsa' q'uejli ti ñuc ti pejtelel pañimil. WΛle ts'a'lebilix che' bajche' xñujp'el.

²Jini tsa' bΛ cΛjchiyob majlel mi' ñusañob ac'Λlel ti uq'uel. Ma'anic mi' tijq'uel i ya'lel i wut. Ma'anic mi juntiquilic i yaj coltaya ti' tojlel pejtcl jini tsa' bΛ i c'uxbiyob ti yambΛ ora. Tsa' laj sujtiyob ti' contra. ³¿Chucoch cΛchΛl tsa' pΛjyi majlel Judá ti' wenta i yum am bΛ ti ñajtal? Cha'an ti' caj i mul. Tsi' cΛcha yaño' bΛ. Tsi' tic'layob. WΛle majlemix ti ñajtal. Che jach meq'uel i c'Λb. Ma'anic i ñach'tilel i pusic'al come añachix ti' wenta xtic'layajob.

⁴Ch'ijiyem pejtcl i bijlel Jerusalén. Ma'anix mi' chΛn letselob ti tejclum ti mojt ti mojt cha'an tijicña mi' melob q'uin. Jejmenix i ti'. Ch'ijiyem i pusic'al jini motomajob. Tic'lΛbilob tsa' pΛjyiyob majlel jini xch'ocob. ⁵Añobix ti' wenta i contrajob. Woli' mΛjlel i cha'añob. Lac Yum woli' jultesΛben i pusic'al Judá cha'an ti' caj cabΛl i mul. PΛybilob majlel ti to'ol e'tel i yalobilob. Tic'lΛbilob cha'an i contrajob. ⁶Tsa'ix jili pejtcl i ñuclel Sion. Tsa' sujtiyob i yumob che' bajche' me' mach bΛ anic chuqui mi' c'ux. Tsa' jili i p'ΛtΛlel ti' tojel i wut jini woli bΛ i yajñesañob. ⁷Che' c'unix pañimil cha'an cabΛl xΛmbal, tsi' ña'tayob i ñuclel yic'ot i chubΛ'an am bΛ i cha'an

ti Jerusalén che' tijicñayob to. Che' bΛ tsa' bac' tili i contra cha'an mi' jisañob, ma'anic majqui tsi' coltayob mi ts'ita'ic. Tsa' cajiyoob ti wajleya i contrajob che' bΛ tsi' q'ueleyob ti wocol.

⁸Jontol jax Jerusalén cha'an i mul. Tsa' sujti ti bibi' ti' wut Dios che' bajche' sajtem bΛ. Ti yambΛ ora jini winicob ti yan tac bΛ lum tsi' c'uxbiyob. Wale mi' ts'a'leñob, come pits'ilix. Mi' mΛyob i wut cha'an quisin. Mi' cha'leñob ajcΛn. ⁹Tsi' cha'leyob ts'i'lel. Ma'anic tsi' p'isiyob ti wenta mi muc'ach i tojob i mul. Jini cha'an quisintic jax tsi' meleyob. Wale ma'anic i yaj coltaya. Mi' yΛlob: Q'uele bajche' añon lojon c Yum, cha'an cabal lojon c wocol, come wen chan mi' melob i bΛ j contrajob, che'ob. ¹⁰I contrajob tsa'ix i laj chilbeyob i chubΛ'an letsem tac bΛ i tojol. Woli' yochelob ti ch'ujul bΛ a wajñib ba' tsi' tempayob i bΛ a winicob, ba' tic'bil mi' yochel jini mach bΛ judíoic. ¹¹Pejtel c pi'Λlob woliyob ti ajcΛn cha'an wi'ñal che' mi' saclañob ñumel i bal i ñac'. Tsi' yac'ayob i chubΛ'an i q'uexol i waj ame chamicob. Q'uele, c Yum. Otsan ti a pusic'al, come p'ump'uñon. Ts'a'lebilon.

¹²¿Mach ba la' wentajic jatetetla woliyet bΛ la ti ñumel? Q'uele mi an yambΛ woli bΛ i cuch wocol che' bajche' joñon. P'ump'un tsi' meleyon c Yum che' calax jax i mich'ajel. ¹³Ya' ti chan tsi' choco jubel c'ajc cha'an mi' jisañon. Tsi' yac'Λ coc ti yac yubil. Tsi' cha' chocoyon majlel. C'un pañimil che' mi' sac'an c'ΛlΛl mi' yic'an. Ma'anix c p'ΛtΛlel. ¹⁴Cabal c mul, tsΛts cΛchΛl tic bic' yubil che' bajche' i te'el wacax. Woli' wit'on c Yum. Tsi' jisabeyon c wersa. Tsi' yac'ayon ti' c'Λb j contra ba' mach mejlicon ti colel. ¹⁵Lac Yum tsi' jisabeyob i p'ΛtΛlel pejtel jini ch'ejlo' bΛ tic tojlel lojon. Tsi' pΛyΛ tilel jini ñajt bΛ ch'oyolob cha'an mi' jisañob jini ch'iton winicob. Lac Yum tsi' juch'teq'ue Judá che' bajche' mi lac pets'ben loq'uel i ya'lel ts'usub.

¹⁶Jini cha'an mic cha'len uq'uel. Cabal i ya'lel c wut. Ma'anic caj coltaya mu' bΛ i tijicñesan c pusic'al. Meba'obix calobilob yilal. Añobach ti' wenta j contrajob. ¹⁷Sion mi' letsan i c'Λb ti c'ajtiya, pero ma'anic i yaj coltaya. Lac Yum tsi' cha'le mandar cha'an mi' laj tejchelob ti' contra Jacob. Bibi'ix Jerusalén ti' wutob jini año' bΛ ti' joytΛlel. ¹⁸Sion woli' yΛl: Toj lac Yum ti pejtelel i melbal, pero an c mul cha'an tsac ñusabe i t'an. Ubin c t'an che' jini, pejtel winicob. Q'uele c wocol. Majlemobix

ti to'ol e'tel jini calobilob, jini xch'ocob yic'ot ch'itoñob c'uxbibilo' ba c cha'an. ¹⁹Tsaj c'ajtibeyob j colt'antel jini tsa' ba i c'uxbiyoñob, pero tsa' sujtiyob tij contra. Tsa' ch'amiyob ti wi'ñal jini motomajob yic'ot jini xñoxob che' ba tsi' sac'layob ñumel i bal i ñac' wa' ti tejclum, che'en.

²⁰Q'uele c Yum. Wen ch'ijiyemon. Wocol jax mi cubin tic pusic'al. Wolic mel c pusic'al cha'an cabal c mul. Tsac ñusabeyet a t'an. Ya' ti bij woli' ch'amelob cabalob ti espada. Ti mal otot woli' ch'amelob ti c'amajel. ²¹Ubiñon cha'an woliyon ti ajcan. Ma'anic ba' mic taj caj coltaya mi juntiquiliic. Tsi' q'ueleyoñob ti wocol j contrajob. Tijicñayob cha'an tsa' wac'ayon ti wocol. Tsa' mele che' bajche' tsa' wan ala. La' jilicob ja'el che' bajche' joñon. ²²Q'uele pejtél i jontolil. Melben che' bajche' tsa' melbeyon cha'an ti' caj c mul. Cabal woliyon ti ajcan, ch'ijiyem c pusic'al.

Tilem ti lac Yum i ch'ijiyemlel Sion

2 M'acal ti tocal Sion cha'an mich' lac Yum. Tsi' choco jubel Israel. Tsi' jisabe i t'ojlawib. Tsi' ts'a'le i t'uchlib i yoc ti' yorajlel i mich'ajel. ²Lac Yum tsi' jisa pejtél chuqui tac c'uxbibil i cha'an Jacob. Ma'anic tsi' wis p'unta. Tsi' jisabe i ts'ajquil ba' lon xuc'ul i pusic'al Judá. Tsi' jisabe i ñuclel i yumob. Tsi' chocoyob jubel ti lum. Ma'anix i yumantel. ³Lac Yum tsi' laj loc'sayob ti' ye'tel cha'an calax jax i mich'ajel. Ma'anic tsi' wis coltayob che' ba tsa' tiliyob i contrajob. Tsi' tsuc'u c'ajc ti' yojlil i lumal Jacob. Tsa' pam ñumi ti pañimil. ⁴Woli' sats' i jalajb yilal. Wa'alix woli' contrajin Sion. Tsi' yac'a ti jisantel pejtél chuqui tac uts'atax ti' wut i yalobilob. Calax jax i mich'ajel che' bajche' c'ajc.

⁵Lac Yum i contrajach Israel. Tsi' laj jisa yic'ot ñuc ba i yotot tac yic'ot i ts'ajquil. Tsi' yac'a ti wocol Judá, we'ecña ti uq'uel. ⁶Lac Yum tsi' jeme i yotot che' bajche' mi lac jem ts'usubil mach ba anic i c'ajñibal. Tsi' jisa i yajñib ba' tsi' tempayob i ba i winicob. Tsi' yac'a ti ñajayel lac cha'an jini q'uin sábado yic'ot pejtél q'uiñijel. Tsi' ts'a'le jini rey yic'ot jini motomaj. Tsi' loc'sayob ti' ye'tel. ⁷Tsi' ts'a'le i pulantib yic'ot ch'ujul ba i yajñib. Tsi' yac'a ti jisantel jini colem otot tac ti' c'ab i contrajob. Tsi' cha'leyob oñel ya' ti' yotot lac Yum che' bajche' ti' yorajlel q'uiñijel.

⁸Lac Yum tsi' yac'la ti jisantel i ts'ajquil Sion che' bajche' tsi' wan ña'ta ti' pusic'al. Tsi' yotsabe i mojonlel tejclum ba' jaxal mi' jisantel. Jini cha'an tsa' yajli ts'ajc ti' tojlel. ⁹Ma'anix i c'ajñibal i ti' tac tejclum. Jejmenix pejtel i c'aclib yic'ot i barate', come lac Yum tsi' jisayob. Majlemobix ti ñajtal jini rey yic'ot año' ba i ye'tel. Ma'anix majqui mi' chan cantesañob ti ley. Lac Yum tsi' caya i pejcan jini x'alt'añob. ¹⁰Ñach'al jini xñoxob. Buchulob ti lum, lapal i cha'añob coxtal. Mi' mujlañob i jol ti' ts'ubeñal lum cha'an i ch'ijiyemlel i pusic'al. Jini xch'ocob mi' lijob i jol cha'an quisin.

¹¹C'unix pañimil mi cubin cha'an cabal uq'uel. Chalquix c wut. Ch'ijiyem c pusic'al. Cabal mic mel c pusic'al che' mij q'uel chuqui woli' yujtel tic lumal. Woli' chamelob ti bij alalob mach ba anic i chu'. ¹²Woliyob ti uq'uel jini alalob. Mi' chan subeñob i ña': Com waj. Com ja', che'ob. Mi' yajlelob ti bij che' bajche' jini jec'bilob ba ti espada. Mi' chamelob, meq'uelob i cha'an i ña'. ¹³¿Chuqui mi mejlel c subeñetla, c pi'lob ti Jerusalén? ¿Bajche' mi mejlel c ñach'tesabeñet la' pusic'al? Come cabal la' wocol che' bajche' i yonlel colem ñajb. Jisabiletla. ¿Majqui mi mejlel i lajmesañetla?

¹⁴Cabal tsi' lotiyetla jini x'alt'añob la' cha'an. Tonto i t'an. Ma'anic tsi' pasbeyet la' mul cha'an mi la' sutq'uin la' ba. Tsi' cha'leyob lot. Tsi' yalayob ma'anic mi caj la' pajyel majlel ti to'ol e'tel ti' wenta la' contrajob. ¹⁵Woli' wajleñetla pejtel jini xñumelob: ¿Jim ba i t'ojol jax ba tejclum? ¿Jim ba jini tejclum c'uxbibil ba i cha'an pejtel pañimil? che'ob. ¹⁶Mi' wajleñetob la' contrajob. Mi' ts'a'leñetob. Tsa'ix lac jisayob, che'ob. Jal tsa' lac pijta ili q'uin. Tsa'ix juli wale. Tsa'ix laj q'uele i jilibal, che'ob.

¹⁷Pero jiñach lac Yum tsa' ba i mele Jerusalén che' bajche' tsi' wan ala. Tsi' ts'actesa i t'an che' bajche' tsi' yala wajali. Tsi' chocoyet jubel. Ma'anic tsi' p'untayet. Tsi' colta a contrajob. Jini cha'an chan woli' melob i ba ti a tojlel, tijicñayob i pusic'al.

¹⁸Tsa' cajiyetla ti uq'uel ti' tojlel lac Yum cha'an jejmenix i ts'ajquil Sion. La' loq'uic i ya'lel la' wut ti q'uiñil yic'ot ti ac'alel che' bajche' i ya'lel pa'. Mach mi la' lujb'an ti uq'uel. Mach yomic mi la' cya cha'an wayel. ¹⁹Ch'ojyenla ti ac'alel. Pejcanla Dios. Lu' subenla i ch'ijiyemlel la' pusic'al che' bajche' mi' bejq'uel loq'uel ja' ti' yajñib. Letsan la' c'ab ti c'ajtiya

cha'an mi' p'untan la' walobilob, come woli' chamelob ti wi'ñal ti jujump'ejl bij.

²⁰C Yum, ña'tan ili winicob x'ixicob, come a cha'añobach. ¿Yom ba mi' c'uxob i bac'tal i yalobilob tsa' ba i meq'ueyob? ¿Yom ba mi' chamelob motomajob yic'ot x'alt'añob ya' ti' Templo lac Yum? ²¹Q'ueleyob ya' ba' ñololob ti lum jini ñoxobix ba yic'ot ch'iton winicob yic'ot xch'ocob. Laj tsansabilob ti espada cha'an i contrajob. Jatet tsa' tsansayob cha'an mich'et, c Yum. Tsa' tsansayob, ma'anic tsa' p'untayob. ²²Tsa' wan ña'ta jini q'uin cha'an ma' jisañob. Ma'anic majqui tsa' mejli ti puts'el ti' yorajlel a mich'ajel. Ma'anic majqui tsa' cale. Laj chameñobix ya' ti bij jini tsa' ba c meq'ueyob tsa' ba j cosayob. Tsi' laj jisayob j contra.

An lac pijtaya ti Dios

3 Joñoñach tsa' ba j q'uele pejtél jini wocol tsa' ba i choco tilel Dios ti' mich'ajel. ²Tsi' palyayon ochel ba' ic'ch'ipan ba pañimil. Tsi' ñup'uyon ba' ma'anic mi ts'ita'ic c'ajc. ³Isujm tsa'ix sujtí tij contra. Woli' yac'on ti wocol ti q'uiñil yic'ot ti ac'alel. ⁴Tsi' jisabeyon c p'at'alel. Ñoxoñix yubil. C'ux c baquel. ⁵Tsi' ñet'eyon ti xajlel yubil. Jini jach wocol yic'ot ch'ijiyem ba mi cubin. ⁶Tsi' yac'ayon ti ajñel ti mal lum che' bajche' ch'ujlelal. I'ic' i mal. ⁷Tsi' wa'choco ts'ajc tic joytilel. Mach mejlicon ti loq'uel. Tsi' calchayon ti cadena. Alatax. ⁸Mic cha'len oñel, mic cha'len uq'uel, pero ma'anic mi' yubin c t'an che' mic pejcan. ⁹Ñup'ulon ti chan ba ts'ajc piyicña ba. Mactabilon ame loq'uicon. Tsi' yac'la ti asiyel pañimil tic tojlel. ¹⁰Lajal mi' pas i ba tic tojlel che' bajche' oso o mi bajlum mu' ba i chijtañon ti mucul. ¹¹Mi' chucon, mi' tuje'añon majlel ti mate'el yubil. Lojwemon, tsi' calyayon ba' ma'anic j colt'antel. ¹²⁻¹³Tsi' loco i jalajb. Tsi' juluyon. Tam tsi' choco ochel i te'el tic pusic'al. ¹⁴C pi'alob mi' tse'tañoñob. Leco mi' cha'leñoob c'ay. Mi' ñusañob q'uin ti c'ay. ¹⁵Lac Yum tsi' yaq'ueyon cabal wocol. Wen ch'aj mi cubin. Wen ch'ijiyem c pusic'al cha'an ili wocol chocbeilon tilel i cha'an c Yum. ¹⁶Wolij c'ux lum yic'ot xajlel yubil. Tsa' c'ascuyi i baquel quej. Tsi' yac'ayon ti wutst'al ti' tañil c'ajc. ¹⁷C Yum, ma'anix i ñach'talel c pusic'al. Anix ora tsa' chilbeyon pejtél tijicña ba. ¹⁸Tsa cala: Ma'anix c p'at'alel. Ma'anix j colt'antel tic Yum, cho'on.

¹⁹Chan ña'tañon wa' ba' woliyon ti wocol. Q'uele i ch'ijiyemlel c pusic'al cha'an jini ch'aj ba. ²⁰Mach sajtic tic pusic'al i ña'tantel wocol. Jini cha'an mach lajmic i ch'ijiyemlel c pusic'al. ²¹Pero anto junchajp c pijtaya, ²²come cabal i yutsllel i pusic'al lac Yum. Jini cha'an cuxulon to la. Ma'anic tsi' laj jisayonla. Xuc'ul lac Yum, mi' chan p'untañonla ti pejtelel ora. ²³Mi' pasbeñonla i yutsllel ti jujump'ejl sac'an. Xuc'ul i pusic'al ti pejtelel ora. ²⁴Lac Yum jiñach c wenlel. Jini cha'an mic chan pijtan. ²⁵Lac Yum uts'at mi' pas i ba ti' tojlel jini mu' ba i pijtañob yic'ot jini mu' ba i saclañob. ²⁶Yom mi lac ñop lac Yum. Yom mi lac chan pijtan ti' xuc'tilel lac pusic'al jinto mi' coltañonla.

²⁷Uts'at mi laj cuch wocol che' ch'itoñon to la. ²⁸Jini woli ba ti wocol la' i bajñel cuch. Yom ñach'al i pusic'al, come Dios tsi' yaq'ue i cuch. ²⁹La' jultesabentic i pusic'al. La' i ch'ujutesan i Yum. Tic'al mi mux i lajmel jini wocol. ³⁰La' i yac' i ba ti jajts'el. Mach yomic mi' may i wut. La' i cuch che' woli' ya'lentel. ³¹Come mach ti pejtelelic ora mi caj i tats' i ba lac Yum. ³²Isujm mi' yac'onla ti wocol, pero p'isbil jach. Mi caj i pasbeñonla i yutsllel i pusic'al mach ba p'isbilic. Cabal jax i c'uxbiya. ³³Mach tijicñayic i pusic'al che' mi' yac'onla ti wocol, che' mi' p'isbeñonla ch'ijiyem ba.

³⁴⁻³⁶Mach jinic Dios mu' ba i juch'tec' xñujp'elob ti yebal i yoc, mu' ba i yac' ti contrajintel jini toj ba winic che' playbil ti meloñel ti' tojlel jini C'ax Ñuc Ba. Lac Yum mach uts'atic mi' q'uel che' woli' ts'a'lentel jini toj ba ti meloñel. ³⁷¿Mach ba p'atalic i t'an lac Yum? Che' mi' cha'len t'an mi' bac' ujtcl che' bajche' tsi' yala. Tilem ti' pusic'al lac Yum chuqui mi' yujtel. ³⁸¿Mach ba tilemic ti jini C'ax Ñuc Ba pejtcl ñuc ba wocol yic'ot pejtcl lac wenlel?

³⁹¿Chucoch tilebixel i pusic'al winicob? La' i cha'len uq'uel jujuntiquil cha'an ti' caj i mul. ⁴⁰La' lac wen q'uel lac ba ti jujuntiquilonla mi an lac sajtemal. La' sujticlonla ba'an lac Yum. ⁴¹La' la caq'uen Dios lac pusic'al che' mi lac letsan laj c'ab ti' tojlel. ⁴²Añach lac mul. Tsa' lac ñusabe i mandar. Maxto anic tsi' ñusabeonla lac mul.

⁴³Mich' tsa' pasa a ba che' ba tsa' wajñesayon lojon. Tsa' tsansayon lojon. Ma'anic tsa' p'untayon lojon. ⁴⁴Tsa' maca a ba ti total. Mach ñumic c t'an lojon che' mic ch'ujutesañet

lojon. ⁴⁵Jatet tsa' wac'ayon lojon ti ts'a'llentel ti' tojlel pejtél winicob. Leco mi' q'ueloñob. ⁴⁶J contrajob lojon tsi' laj a'leyon lojon. ⁴⁷Jini cha'an cabal mic cha'len lojon baq'uen come lu' jilemix c lumal yic'ot c chub'an. Cabal mi cubin lojon wocol. Junyajlel jisabilon lojon.

⁴⁸Cabal mic cha'len uq'uel. Ach'ix c wut cha'an i ya'lel c wut, cha'an tsa' jiliyob c pi'llob mu' ba j c'uxbin. ⁴⁹Mach yujilic tijq'uel i ya'lel c wut. Ma'anic mij c'aj co, ⁵⁰jinto mi' q'uelon c Yum am ba ti panchan, jinto mi' cha' ña'tañon. ⁵¹C'ux c pusic'al cha'an i tic'lantel pejtél jini xch'ocob ch'oyolo' ba tic tejclum. ⁵²Tsi' yajñesayoñob c pi'llob tsa' ba i contrajiyoyob. Tsi' ña'tayob i chucon che' bajche' mut. ⁵³Tsi' chocoyoñob ochel ba' tocol lum. Tsi' juluyoyob ti xajlel. ⁵⁴Tsa' ñumi ja' ti pam c jol. Tsa cala: Mach chan colicon, cho'on. ⁵⁵Ya' ti mal lum tsac pejcayet, c Yum. ⁵⁶Tsa' wubi c t'an. Mach ma' mac a chiquin che' woliyon ti uq'uel. ⁵⁷Tsa' lac'tesa a ba ti jim ba ora che' ba tsac pejcayet. Tsa' wala: Mach a cha'len baq'uen, che'et.

⁵⁸Jatet, c Yum, tsa' xin ota a ba che' ba tsaj c'ajtibeyet j coltantel. Tsa' wac'ayon ti cha' colel ame chamicon. ⁵⁹Jatet, c Yum, tsa' q'uele c tic'lantel. Meleyon ti toj. La' i ña'tañob c pi'llob a winicon. ⁶⁰Tsa' q'uele che' ba tsi' sutq'uibeyoyob jontolil. Tsa' q'uele pejtél chuqui tsi' ña'tayob i mel tij contra. ⁶¹Jatet c Yum tsa' wubi che' ba tsi' wajleyoyob, yic'ot che' ba tsi' ya'leyoyob. ⁶²C'am tsi' cha'leyob t'an tij contra. Tsi' temeyob i t'an ti mucul c'lalal tsa' ñumi q'uin. ⁶³Q'ueleyob ya' ba' buchulob. Q'ueleyob che' mi' ch'ojyelob. Che' mi' cha'leñob c'ay mi' wajleñob. ⁶⁴Jatet, c Yum, mi caj a sutq'uibeyob che' bajche' an i melbalob. ⁶⁵Mi caj a chilbeñob i ña'tabal ame i ch'ambeñob isujm. Mi' cajelob ti p'ajtal cha'an tsi' ñusayob a t'an. ⁶⁶Mi caj a wajñesañob ti cabal a mich'ajel. Mi caj a jisañob wa' ti pañimil ti' tojel a wut.

Sion tsa'ix i tojo i mul

4 Tsa'ix sujti ti bibi' jini oro. Ma'anix i c'ac'al. Pamal an jini xajlel tac ba' jejmenix otot. ²Wen c'uxbibilob i yalobilob Sion che' bajche' oro letsem tac ba i tojol, pero ts'a'lebilobix che' bajche' uc'um che' tojpe'mix. ³Jini jontol ba tsi' mi' tsu'san i yal, pero ñumen jontolob jini x'ixicob israelob. Mi'

clayob i yalobilob che' bajche' mi' clay i yal avestruz ya' ti colem ba i tiquinal pañimil. ⁴Lap'ix i yac' alalob cha'an tiquin i ti'. Jini alalob mi' c'ajtiñob waj, pero ma'anic majqui mi' xut'beñob. ⁵Ti yamba ora ñamalob ti dulce yic'ot i bal i ñac', pero wale woli' chamelob ti wiñal ya' ti bij. Ti yamba ora wen fino i pislel. Wale ñololob ti ta'. ⁶Ti' caj i mul c pi'alob woli' chamelob, come tsa' ñumi ti p'is i mul che' bajche' i mul Sodoma. Tsa' bac' jili Sodoma, anquese ma'anic i contrajintel ti winicob.

⁷Ti yamba ora wen i t'ojol jax lac yumob. Sasac i pislel che' bajche' i ña'al tsañal yic'ot lech. Wen c'oc' i bac'tal. Chachac i ch'ich'el che' bajche' rubí. I t'ojol jax che' bajche' zafiro. ⁸Pero wale i'iq'uix i pachalel che' bajche' but's!. Mach cambilobic i cha'an i pi'alob. Tiquinix i pachalel, yajyajob. Che'ach i baquel bajche' te'. ⁹Tijicñayob jini tsa' ba chamiyob ti espada. P'ump'uñob jini woliyo' ba ti chamel ti wiñal. C'unte' woli' chamelob cha'an ma'anic i bal i ñac'. ¹⁰Anquese mi' c'uxbiñob i yalobilob, jini x'ixicob tsi' ch'axayob cha'an mi' c'uxob, i wenta i bal i ñac' che' ba tsa' puli jini tejclum.

¹¹Lac Yum tsi' meleyonla. Calax jax i mich'ajel. Tsi' tsuc'u c'ajc ti Sion. Laj jilemix ti c'ajc c'alal ti yebal. ¹²Jini reyob ti pañimil ma'anic tsi' ñopoyob. Ma'anic majqui tsi' ñopo anquese wan subebilob cha'an talob laj contrajob mu' ba caj i jisañob Jerusalén. ¹³Tsa' jili cha'an ti' caj i mul jini x'alt'añob, ti' caj i jontolil jini motamajob tsa' ba i tsansayob jini tojo' ba. ¹⁴Tactacñayob woli' ñumelob ti bij che' bajche' xpots'ob. Pac'bilob ti ch'ich'. Tsi' bib'esayob pejtel chuqui tac tsi' tlayob.

¹⁵I pi'alob tsi' subeyob: Cucula, bibi'etla. Cucula, ame la' pac'on lojon, che'ob. Tsa' puts'iyob. Tsa' ñumiyob ti pañimil. Ma'anic majqui tsi' payayob ti chumtal. Mach mi la' wajñel quic'ot lojon, che'ob pejtel winicob. ¹⁶Lac Yum tsi' pucuyob. Mach uts'atic mi' q'uelob. Ma'anic tsi' c'uxbiyob jini motomajob. Ma'anic tsi' pejayob jini xñoxo' ba ti uts ba t'an. ¹⁷Cuxulon to la, pero c'unix pañimil che' mi lac lon saclan laj coltantel. Tsa' laj c'ajti ti' tojlel jini mach ba yujilic p'untaya.

¹⁸Tsi' mactayonla ti bij ame puts'iconla. Lac'alix i yorajlel lac chamel. Ma'anix jayp'ejl q'uin. Isujm i yorajlelix mi lac chamel. ¹⁹Tsi' yajñesayonla laj contrajob, ñumen p'is ti ajñel bajche' xiye' ti panchan. Tsi' yajñesayonla ti wits. Tsi'

chijtayoñob ti jochol ba lum. Tsi' yaLa i jisayonla ti mal lum. ²⁰Tsi' chocoyob ochel ti tocol ba lum jini yajcabil ba ti Dios. Tsa' la caLa: Añonla ti' wenta lac Yum. Mux caj lac chumtal ti' yebal i wich' che' pujquemonla ti' tojlel jini sajtemo' ba, cho'onla.

²¹Tijicñayetla i yalobiletla Edom ya' ba' chumuletla ti' lumal Uz. Pero mi caj la' waq'uentel wocol ja'el. Mi caj i tajetla i mich'ajel Dios. ²²Wa' jach jaxal mi caj a toj a mul, Sion. Ma'anix mi caj a chan pajyel majlel ti to'ol e'tel. Wale lac Yum mi caj i melet, Edom. Mi caj i tsictesan a mul.

Tsi' c'ajti i p'untantel ti oración

5 Chan q'uele chuqui woli cubin lojon, c Yum. Q'uele bajche' woli ca'lentel lojon. ²Tsa' ochiyob yaño' ba tic lum lojon tsa' ba a waq'ueyon lojon. Jini ñajt ba ch'oyolob tsi' chilbeyon lojon cotot. ³Tsa' sujtiyon lojon ti meba'. Ma'añobix c tat lojon. Meba' x'ixicob c ña' lojon. ⁴Che' com lojon ja' wersa mic toj lojon. Letsem i tojol c si' lojon. ⁵Mi' juch'tec'oñob c yum lojon. Ma'anic mic wis c'aj lojon co. Pejtel ora woliyon lojon ti e'tel. ⁶Tsaj c'ajtibe pan Egipto. Tsaj c'ajtibe Asiria ja'el.

⁷Tsi' cha'leyob mulil c tat lojon. Jini cha'an mach chan añobix. ⁸Añon lojon ti' wenta jini mu' ba c yuman lojon. Ma'anic majqui mi' yac'on lojon ti coel. Balaq'uen mic tsansantel lojon che' mic saclan lojon c waj. ⁹Mi' pasbeñob espada ya' ti jochol ba lum. ¹⁰Wen ticaw jax c pachalel lojon che' bajche' c'ajc. Woliyon lojon ti c'ajc cha'an wiñayon lojon. ¹¹J contrajob tsi' tic'layob x'ixicob ti Sion yic'ot xch'ocob ti Judá. ¹²Tsi' jich'iyob yumalob ti' c'Abob. Ma'anic tsi' p'untayob jini ñoxobix ba. ¹³Tsi' yaq'ueyob i cuch ña'tun jini ch'itoñob. Colel i yajlel cha'an woli' cuchob tilel si' cabal ba i yalel.

¹⁴Ma'anix mi' chan cha'leñob meloñel jini ñoxobix ba ti' ti' tejclum. Ma'anix mi' chan cha'leñob son yic'ot c'ay jini ch'iton winicob. ¹⁵Tsa'ix ñumi i yorajlel i tijicñayel c pusic'al lojon. Tsac junyajlel caya lojon son cha'an uq'uel. ¹⁶Ma'anix c yumantel lojon. Obol lojon c ba come tsa'ix c cha'le lojon mulil. ¹⁷Jini cha'an c'uñix lojon c pusic'al. Ma'anix mi' wen c'otel c wut lojon. ¹⁸Cabal woli' p'ojlelob wax ya' ti wits Sion ba' ma'añobix winicob.

¹⁹Jatet, c Yum, xuc'ulet ti a buchlib ti pejtelel ora. Ma'anic i jilibal a yum^Δntel tic tojlel lojon yic'ot ti' tojlel calobil lojon yic'ot i yalobilob ti pejtelel ora. ²⁰¿Chucoch ñajayemon lojon a cha'an? ¿Chucoch c^Δybilon lojon a cha'an? ¿Mu' ba caj a c^Δyon ti pejtelel ora? ²¹Sutq'uiñon lojon cha'an mic l^Δc'tesan lojon c b^Δ ba' añet, c Yum. Tsijibtesañon lojon cha'an mic cha' tsajcañet lojon che' bajche' ti ñaxan. ²²¿Mu' ba caj a junyajlel c^Δyon lojon? ¿Mach ba yujilic lajmel a mich'ajel tic tojlel lojon?